

AMETS ZUBIZARRETA ETXANIZ

B Maila | Bertsoa | 2. saria

Ni Amets Zubizarreta Etxaniz naiz eta 15 urte ditut. Beasaindarra naiz. Kirola egitea asko gustatzen zait. Sorkuntza gustatzen zait, bai prosa eta bai bertsoa. Bertso hauekin kritika sozial bat egin nahi nuke, gure bizitzetan zakur bihurtu gabe otso izateko. Mugitzen ez denak ez baititu bere kateak sentitzen.

ZAKUR ALA OTSO?

DOINUA: Aita izena kanta beharrak

Lehertuta nago beste egun bat

ia deskantsatu gabe

neguan ilargia delako

otso guztiontzat jabe

jana ere urria izaten da

ene tripa dago grabe

soluzio bat okurritzen zait

nahiz ta zaila den hala ere

aurkitu nahi dut Txanogorritxu

berriz ere parez pare.

Beste egun bat aurrera doa

tripak jarraitzen du hutsik

janari bila nenbilenean

atera da sasi artetik

hortxe ikusi dut nere aurrean
eta gelditu naiz muturik.
Txanogorritxu agertu baita
kate batekin eskutik
babesten duen zakur bat dauka
jada ez du nire beldurrik.

Zakurrek eta otsook daukagu
bastante antzeko traza
nahiz eta tartean badauzkagun
bereizteko hainbat arraza
zakur ez dezu azkenaldian
nik beste goserik pasa
deskantsatu egiten dezu eta
bizia duzu jolasa
nola bihur dezaket nerea
zurea bezain erraza.

Otso zaharkitu egin zera
ni naiz zakur modernoa
orain lagundu egiten degu
babesteko naiz jaioa
egunerokoan erraz ditut

jana eta lo goxoa

maitasuna ere ematen didate

eskainiz haien altzoa

gure etxera etor zaitezke

hau baduzu desioa.

Kontatzen duzun bizitza oso

polita eta ona da

oso gustura joango nintzen

ni jabearen sofara

eta ze gustura hartu jabeak

emandako besarkada

baina harritu naiz kate bat duzu

lepotik zintzilik hara!

otsoak askatasun guztian

bizitzeko jaio gara

Erosotasunean jarrita

bizitza erreza daukazu

baina konturatu gabe jasan

dituzu hainbat abusu

bihotzetik esaten dizut nik

entzun zaidazu lehengusu

nahiz eta eduki ditzakezun

hainbat muxu eta luxu

erosotasunaren kartzelan

askatasuna ahaztu duzu.